

## I Trei Rees demò te geja

*L risech sanitàer à condizionà enche i ciantores de la steila, ma gropes de picoi e gregn à portà inant la tradizion l dì de Pèsca Tofènia ti paijes de Fascia*



*I Trei Rees Marco, Cristian e Adam a Ciampedel.*



*Aaron, Ian e Davide te geja de Cianacei.*



*L grop de gregn à ciantà te geja de Poza.*



*Mattia, Thomas e Elia con l arziscop Bressan.*



*Tullio, Stefan e Simone con don Andrea a Soraga.*



*La trei Reines a Pera: Annachiara, Sara e Mery.*

No l é amò tempes – e speron dassen che n auter an la mude – per jir fora per la cèses con la steila a portèr la bona noela de la nasciuda del Babin, aldò de la tradizion amò n muie sentuda te Fascia.

Enche chest an i Trei Rees no se à fidà jir stroz per la majons, e enche olache l era stat metù en program de jir fora per strèdes e piazes ciantan te paisc vejìn a la cripeles, a la fin dut l é stat descancelà.

Ampò per no fèr morir del dut la tradizion, vèlch grop de Trei Rees se à podù l veder beleche te duc i paijes de Fascia, l dì de Pèsca Tofènia domesdi, te la zelebrazion de benediscion di bec.

A Ciampedel e a Cianacei, con don Mario Bravin, te chesta ocasion l é stat contà la storia di Trei Rees, omegn studiè e potenc peé via da dalonc per ge jir do a na steila che anunzièa vèlch da maraveous, che no à bazilà a se pièr ju per adorèr n

picol bez tanche nasciù desch l più scempie e puret sun chesta tera. I trei bec, Davide, Aaron e Ian a Cianacei, Marco, Cristian e Adam a Ciampedel, i é jic a adorèr l Babin sun utèr e a duc i bec te geja i ge à sport n picol don.

I Trei Rees é rué enche a Pera, Poza e Soraga. Te la zelebrazion de benediscion di bec de la parochies de don Andrea a caraterisèr chest moment l é stat na getria, metuda sun utèr recordan l ensomech de

Giacobbe protagonist de la letura, ma enche desche segn per envièr i bec a jir su, sorafora l picol mond e la capazità, zenza tema de sutèr ju, e per ge recordèr che l é n mond che li speta e l é besegn de bec e joegn bogn de vardèr più en aut, per fèr su chest nef mond mior. A ciantèr la ciantia di Trei Rees a Soraga con don Andrea l era Stefan, Tullio e Simone, a Pera con p. Chretien l era enveze trei Reines, Annachiara, Sara e Mary, e a Poza

con l arziscop emerit Luigi Bressan a se regolèr su con i guanc più sgalizenc l é stat Mattia, Thomas e Elia.

Nesciugn se à regolà coi guanc di Trei Rees a Vich, e enche a Moena la ciantia à ressonà te geja de Sèn Vile en vea de Pèsca Tofènia demò da la oujes del cor.

### A Poza i gregn à ciantà per talian e ladin

Jà da vèlch an a Poza a portèr la bona noela con la cianties de la steila l é n grop de gregn. Encin dantan i jia soraldut fora per la majons olache l era jent de età e te Cèsa de Paussa, a portèr mingol de legreza e compagnia, ma per l secondo an l malac à descomanà de jir fora per la cèses, soraldut olache l é jent de età, e enche l program de jir stroz a ciantèr vejìn a la cripeles te la piazes l é stat descancelà.

La jent à abù demò una ocasion per scutèr la bela cianties che chest grop de Trei Rees e sie pèstres se à emparà con pascion e lezitenza enche chest an: en vea de Pèsca Tofènia a la sènta messa zelebrèda a Poza dal piscop emerit Bressan.

David, Pierpaolo e Stefano, coi pèstres Roberto, Antonio, Vincenzo, Marco, Leonardo e Massimo, i à desmostrà dalbon gran braura. Apede a la ciantia tradizionèla con la paroles per fascian, i à portà dant per ladin enche «L é nasciù l divin Babin» traduzion de la ciantia franzouza «Il est né le divin enfant» e etres toc per talian. La cianties è states adatèdes a 3 oujes e emparèdes col didament del maester Stefano Lazer. I cianta dalbon delvers: podede i scutèr enche tel video su la piata facebook de La Usc di Ladins. 16